

四庫全書

子部

欽定四庫全書

子部

羣書考索後集卷三十四

詳校官中書臣賈汝翼

主事臣祁韻士覆勘

總校官知縣臣楊懋珩

校對官中書臣徐步雲

謄錄監生臣沈安邦

欽定四庫全書

羣書考索後集卷三十四

士門

唐取士之科

唐制取士之科多因隋舊然其大要有三由學館者曰生徒由州縣者曰鄉貢皆升於有司而進退之其科之目有秀才有明經有俊士有進士而又有明法明字明

宋章如愚編

算者焉有一史有三史者焉有開元禮有道舉有童子者焉而明經之別有五經有三經有二經有學究一經者焉有三禮有三傳有史科者焉此歲舉之常選也其天子自詔曰制舉所以待非常之才者也

以上見選舉志

凡學有六曰國子

皆隸國子監

曰太學曰四門學

用禮

記四郊立學之說於四門置學

曰律學書學算學而其

外之州縣則又自有學凡館有二曰弘文館曰崇文館而崇文館每歲仲冬州縣館監舉諸生之成者而送之

於尚書省此之謂由學館之生徒也不由學館者皆懷牒而自列于州縣州縣試已則會之以鄉飲酒之禮歌鹿鳴之詩送于攷功而復試之此之謂州縣之鄉貢也所謂制舉者蓋自有司常選之外天子又自詔四方德行才能文學之士或高蹈幽隱與其不能自達者下至軍謀將略翹關拔山絕藝奇伎莫不兼取其為名目隨其人主一時所欲而列為定科如賢良方正直言極諫博通墳典達于教化軍謀宏遠堪任將率詳明政術可

以理人之類其名最著其所以待之之禮甚優而宏材
偉論非常之人亦時出於其間此之謂天子自詔之科
舉也三者大略如此而士之進取之方與上之好惡所
以育材養士招來獎進之意有司選士之法因時損益
又各不同如小學

高祖詔宗室功臣子孫就秘書外省別為小學
如州縣學則始於高祖之時

於門下別置有生員詳見制度門

崇文館

東宮置亦有生員貞觀十三年置

則置於太宗之世至於有所謂崇玄學

開元二十五年置習莊老諸子

有所謂廣文館

天寶九年置於國學以領生徒為進士者

則又明皇之所增也鄉貢之法至天寶而暫廢

自開元七年帝注老子成詔貢舉人減論語尚書而

加試老子則創崇玄學之意已兆於此天寶二年改
為通道學

蓋欲盡由於學館也明經進士或與孝廉而並行蓋從
楊綰之請也法制之沿革大略如此而其諸科所試之
業又有可言者如明經則有大經禮記春秋左傳中經毛

詩周禮儀禮小經易書公穀二傳

之別如史料則有史

記漢書三國志之別於書則有石經說文字林之辨於
算則有孫子五曹九章海島周髀五經算及綴術緝古

記遺之數秀才之試方略進士之試時務所以策其才也明經之帖文童子之誦文與夫書學之口試墨義所以驗其記也經史三傳諸科又各問其大義或百條或五十條者又所以審其識也此其所習之業大概如此然周禮儀禮在所習也而有所謂開元禮者果何為乎尚書論語所當習也而開元之道舉

即崇玄學中所習老莊故號之道舉

乃易之以老子果何為乎進士之科試以策矣

試時務策五道

自高宗從劉思立之言始於策之外復加以雜文

加雜文二篇通文律者然後試策

進文之科試以詩賦矣至德宗時用趙贊之言

時贊為中書舍人權知貢舉

或罷詩賦而易之箴論表贊是果合于古乎故劉思立

言於前曰明經多抄義條進士惟誦舊策

高宗永隆三年時思立為考工員外郎

楊綰言于後曰

代宗寶應二年時綰為禮部侍郎

進士皆誦當代之文而不通經史明經者皆記帖括至
李栖筠等之議亦以經學者以帖字為精通不窮旨義
考文者以聲病為是非豈知移風易俗之化亦可以見
當時所趨矣是以鄭覃

文宗時以經術位宰相

深嫉進士之浮薄請罷之而李德裕武宗時宰相遂一

切而欲廢之此又忿激不平之論也然大抵唐諸科之目進士尤貴其得人亦最盛焉

進士科當唐之晚節尤為浮薄世所患之

如杜牧白居易楊綰顏真卿韋貫之裴垽皆舉進士第者也歐陽公唐選舉志曰方其取以詞章類若浮文而少實及其臨事設施奮其事業隱然為國名臣者不可勝數遂使時君篤意以為莫此之尚及其後世俗益嬗薄上下交疑因以謂按其聲病可以為有司之責舍是

則汗漫無所守遂不復能易嗚呼乃知三代鄉里德行之舉非至治之隆莫能行也

科舉

大司徒以鄉三物教萬民而賓興之閭胥書其敬敏任恤族師書其孝悌睦婣有學者黨正州長則書其德行道藝鄉大夫三年大比則興賢者能者以禮禮賓之鄉老鄉大夫獻賢能之書于王王拜而受之登于天府內史貳之此古之制也漢世取士策于天子曰賢良方正

察于州郡者曰孝廉茂材升于學校者曰博士弟子以至書疏論事吏稱其職公府辟召亦皆得以自奮於其間大則取其行次則取其學又次則取其言又次則取其能廣其科目以籠天下之材遣詣丞相府書行藝年酈食其家貧落薄縣中謂之狂生韓信家貧无行不得推擇為吏陳湯乞貸無節不為州里所稱故能自持於鄉里者然後州縣拔為幹佐曹吏能自立于州縣者然後五府辟為曹掾能自効於五府者然後為朝廷選用

此猶有古人考行之遺意如晁錯董仲舒公孫弘魏相則以賢良對策舉如路溫舒王吉鮑宣蓋寬饒則以孝廉舉蕭望之匡衡貢禹倪寬則以明經舉主父偃徐樂嚴安則以上書進武帝之詔有令州郡察吏民有茂材異等可為將相及使絕域者是舉茂材者也公孫弘功令有太常擇儀狀端正者補博士弟子通一藝以上補左右內史是舉弟子者也後漢光武以科目取士順帝時左雄有察舉之法限以四十儒者試經學文吏試章

奏於是得陳蕃李膺之徒魏陳羣有九品中正之法及其弊也惟知閥閱非復辨其賢愚故劉毅云下品無高門上品無寒士至隋開皇而罷於是而始有進士之科至唐取士之科大要有三學館曰生徒由州縣者曰鄉貢而天子之自詔者則曰制舉如師德之薦狄仁傑韓愈之排佛老李絳之直道進退陸贄之論諫皆由進士者也張九齡以道侔伊呂進韓休以文經邦國進姜公輔以直言極諫進元稹以才識兼茂進此由制舉得者

也何蕃持節守正而六館之士遂不從亂則學館之所
得者益可知矣然而唐得人之盛尤盛於進士唐史臣
曰方其取以文章類若浮文而少實及其臨事設施隱
然為國名臣者不可勝數是有取於進士也其後楊綰
雖力言進士之弊請復孝廉之科而終不之勝鄭覃嫉
進士之浮薄屢請罷去而卒不之聽李德裕論進士不
根藝實其議亦寢而不行終唐之世進士之科雖不改
而試者猶恨其一切取文藝而畧行實也雖然張昌齡

王公謹有時名而王師旦惡其浮薄不書以第盧照鄰駱賓王文章為冠裴行儉謂其浮躁抑之使不進是豈不足以厚士風乎宋取士有賢良有宏詞有進士數科皆足以得人富公蘇文忠以制科進蘇易楊文忠以宏詞進杜祁公范文正韓魏公歐陽公李文靖向文正皆由進士舉其他名臣何可勝數

學校

古者家有塾黨有庠遂有序國有學大司樂掌成均之

法以治建國之學政而合國之子弟焉凡有道有德者
使教焉故曰樂德曰樂語曰樂舞皆其教之略也大胥
掌學士之版以待致諸子春入學舍菜合舞秋頒學合
聲以六樂之會正舞位皆其教之節也禮射於序則州
長主之飲酒于序則黨正主之春秋時子產不毀鄉校
則春秋猶未盡廢也秦人廢書坑儒則學絕矣漢高祖
時叔孫通為奉常雖有諸子弟共習禮儀然未遑庠序
之事文帝始廣遊學之路武帝慨然上慕三代公孫弘

為學官悼道之久鬱乃請增置博士弟子員太常擇民
儀狀端正者請著功令自此來公卿大夫士吏彬彬多
文學之士矣東漢之興修造大學建明帝行三雍之禮
冠帶圍橋門者億萬計而又別立學舍自期門羽林之
士悉通孝經匈奴亦遣子弟入學此漢儒學之盛也安
和以來博士倚席不講而學舍鞠為園蔬唐制諸學有
國子有太學有四門律學而京師州縣又皆有學皆隸
國子監而博士必為之分經教授太宗增築學舍至十

二百區四方學者雲集京師四夷皆遣子入學范祖禹
作唐鑑亦云唐之儒學惟貞觀開元為盛天寶以後學
校益廢太祖皇帝當干戈甫定首幸國子監天聖中王
沂公守青州請為州立學仁宗時從其請而郡學之建
自此始景祐藩鎮立學而駸駸益盛慶厯三年不獨藩
鎮而州府軍監皆立學矣於斯時也師儒之官其精求
審擇之意見於詔令有曰必取文行學官講說神宗之
時天下官悉自朝廷除授而天下之學愈重矣

教化

司徒一職謂之教典而教法之施凡十有二自此間則使之相保相受自州而鄉則使之相賙而相賓州長之教治政令則屬其民而讀法黨正之政令教治則又屬民而讀法師氏掌詔王者也則教之三德教之三行保氏掌諫王者也則教之以六藝教之以六儀而司諫則掌糾萬民之德而勸之以朋友正其行而強以道藝此化之純被於天下而人有士君子之行也秦人變古一

切以勇力為尚其所以教民者非殺敵獲首之事則戰
爭鬪攘之法里則使相司而連坐家則使子弟而出贅
其相親相保之意將安在哉漢之文帝清淨寡慾躬行
淵默專務以德化民以道德為麗示朴以為先列於朝
廷者如石奮之長者用於州縣者如文翁之興學是以
海內富庶興禮義自愛而重於犯法先行義而後詘辱
也孰謂教化為迂闊哉至於孝武急於用兵興師之事
而何暇教化孝宣區區於獄訟名實之間而何暇教化

唐之太宗却封德彛刑罰之說用魏徵教化之論偃武修文力行仁義鞭背之刑不忍用也斷足趾之法不敢存也是以家給人足歲終斷獄纔二十九人四夷酋長皆襲衣冠坐享仁義之效孰謂教化為迂闊哉明皇狃於太平奢侈之習初何心於教化憲宗奪於皇甫鏘培刻之習而亦莫知所以教化仁宗皇帝在位四十二年專以教化養育天下而生民何其幸歟

射

射之所起起於黃帝繫詞云古者採木為弧剡木為矢
弧矢之利以威天下又世本云揮作弓夷牟作矢皆黃
帝之臣也是弓矢起於黃帝也虞書曰侯以明之是射
見於堯舜也夏商無文周則具矣故弓之別有六司弓
矢曰王弓弧弓以授射甲革楯質者夾弓庾弓以授射
豺侯鳥獸者唐弓大弓以授學射者使者勞者矢之別
有八司弓矢曰枉矢絜矢利矢火射用諸守城車戰殺矢
鏃矢用諸近射田獵矰矢箝矢用諸弋射常矢痺矢用

諸散射侯之別有三司裘曰王大射則共虎侯熊侯豹侯諸侯則共熊侯豹侯卿大夫則共麋侯皆設其鵠周制諸侯歲獻貢士於天子天子試之射宮其容體比於禮其節比於樂而中多者得與於祭數與於祭而君有慶益以地其容體不比於禮其節不比於樂而中少者不得與祭數不得與祭而君有責削以地是以諸侯君臣盡志於射以習禮樂天子將祭必先習射於澤宮澤者所以擇士也又曰射之為言者繹也繹者各繹已志

也故心平體正持弓矢審固則射中矣射有三焉曰大射曰賓射曰燕射士無大射而有賓射燕射庶人無賓射燕射特有主皮之射而已司裘云虎侯熊侯豹侯此大射之侯也梓人所謂張皮侯而棲鵠則春以功是也射人以射法治射儀王射三侯五正諸侯射二侯三正卿大夫射一侯二正士射豹侯二正此賓射之侯也梓人所謂張五采之侯則遠國屬是也鄉射記曰九侯天子熊侯白質諸侯麋侯以赤質大夫布侯畫以虎豹士

皮侯畫以麋豕此燕射之侯也梓人所謂張獸侯以息燕是也大射之侯用虎熊豹麋之皮飾其側而中又制皮以為鵠賓射之侯亦虎熊豹麋之皮飾其側而中畫五采以為正燕射之侯則畫熊麋虎豹鹿豕之形以象鵠此三射之別也若天子諸侯之射則先行燕禮以明君臣之義卿大夫則先行鄉飲之禮以明長幼之序夫三射者貴其容體比於禮其節合於樂故謂之禮射其樂天子以騶虞為節諸侯以貍首為節卿大夫以采蘋

為節士以采繁為節騶虞者樂官備也貍首者樂會時也采蘋者樂循法度也采繁者樂不失職也故明乎其節之志以不失其事則功成而德行立無暴亂之禍而國家安故曰射者所以觀德也白虎通曰天子射百二十步諸侯九十步大夫七十步士五十步所以明尊者所服遠卑者所制近也通典曰按鄭玄說射禮入嘉禮今按五帝三王之時天下萬國迭相征伐士之志藝以射為首是以開元中修五禮以射禮入軍禮焉古者天

子之大射曰射侯者射為諸侯也射中則得為諸侯不
中則不得為諸侯是以諸侯君臣盡志於射以習禮樂
夫君臣習禮樂而以流亡者未之有也漢明帝則行大
射禮於辟雍唐武德則行大射禮於武德殿貞觀則行
於觀德殿開元則賜百官於安福樓下自此遂廢

宋朝淳化五年行大射詔有司講求典故自周官射禮
及開元開寶禮斟酌損益為圖來上其儀之陳始如元
會謁見已事武弁改服酒行有徧樂詩有節熊羆設侯

金石在簾賞物罰爵東陳西置衣裳冠冕制邦尊卑表
著埒位辨遠近威稜儀縟璀璨焜耀帝覽其圖庸極嘉
歎將俟弭兵舉行其禮皇乎烝哉爰暨咸平光紹前列
講肄池上慨想古禮聖聖心傳同出一揆此皆大射之
禮也其外又有鄉射之禮主皮之射有習武之射卿大
夫之職曰以鄉射之禮五物詢衆庶一曰和二曰容三
曰主皮四曰和容五曰興舞漢甘露石渠議黃門侍郎
臨奏鄉射合樂大射則否何也韋玄成曰鄉人無樂故

合之朝廷君臣故有樂矣時以為然此鄉射之禮也主皮之射有二一乃卿大夫從君田獵班餘獲而射書傳曰凡祭取餘獲陳于澤然後大夫相與射也鄭注鄉射云主皮者無侯張獸皮而射之主於獲也二乃庶人主皮之射鄭注周禮云庶人無侯張皮而射之是也此主皮之射也司弓矢曰弧矢以授射甲革楯質者此習武之射也古者祈子帶弓韉生子垂桑弧其成童也教以射其貢也試以射又有投壺之禮以習于射夫投壺之

籌曰矢勝算則以馬贊其詩則以司射實其算則以射
中弦其詩則以射節之貍首鼓其節則以射鼓之半而
釋算數算勝飲不勝皆與射節相類則投壺亦兵象也
蓋兵凶戰危人情之所惡飲酒相樂人情之所欲先王
因其所欲而寓其所惡使其樂為之不憚則平日所習
乃異日之所用也昔晉侯與齊侯左昭十二年宴飲投
壺祭遵臨戎雅歌投壺然則投壺者又古人所以習射
者也其可忽哉

博洽上

博洽之士古今之所重也然其所以為博者則有不同
馬如左史倚相能讀三墳五典八索九丘而右尹子革能
誦祈招之詩司馬遷自幼即誦古文而又南游江淮
上會稽探禹穴窺九疑浮沅湘講業齊魯之都觀夫子
遺風是以涉獵廣博貫穿經傳馳騁今古揚雄博覽無
所不見以為經莫大於易故作太玄傳莫大於論語故
作法言史篇莫善於蒼頡故作訓纂箴莫善於虞箴賦

莫深於離騷故反而廣之辭莫麗於相如故作四賦班
孟堅以為仲舒司馬遷劉向揚雄皆博物洽聞通達古
今又謂向雄博極羣書非虛言也後漢周興博學洽聞
而三墳五典無所不覽謝該博通羣藝周覽古今而孔
融謂其卓然比跡前列

建安中樂詳條左氏疑滯數十事以問該皆為通解
之名為謝氏釋

至於博學稽古周弼比之武庫以為五經縱橫一時

之傑則有若晉之裴顧博綜典籍當時號之為書淫而得武帝一車之書披閱不怠則有若晉之皇甫謐博學多通為左氏經傳集解而自言有左傳之癖則有若晉之杜預博極羣書於文字禽獸草木尤稱精詳則有若梁之顧協徧覽經史人主問以大義及歷代史商較縱橫應答如響者梁之徐摛也博學無所不見聚書至萬餘卷率多異本而五經笥之目虞世南猶能道之者梁之任昉也淹貫古今號為書簾以文選之學講授諸生

者唐之李善也天資好學得集賢書讀之六年無所不通者唐之陽城也天下之書無有不讀而一經目則弗忘文宗以為當代仲尼者唐之王起也此皆博於學問者也漢武帝亡書三篋惟張安世識之後求得其書以相校無所遺失後漢應奉凡所經履莫不暗記錄囚徒數百千人其罪係姓名坐狀輕重無所遺脫王充閱市肆賣書一見輒能誦憶荀悅每之人間所見篇牘一覽亦能誦記禰衡讀蔡邕碑一覽之餘書之不差而所不

能明者止於石缺二字楊脩與曹操讀曹娥碑先悟黃絹壅白之句而謂有智無智校三十里魏王粲讀道旁碑而闇誦之頃不失一字唐蕭穎士與李華陸據讀龍門道旁碑穎士即誦華凡再閱據三乃能盡記而聞者謂三人才于此分焉若乃所談數百千條皆王儉之所未覩而為儉之所歎服者非齊之陸澄乎該通羣籍任昉劉諷輩以秘閣四部之書問其所知自甲至丁各說一事且敘述作之體莫見所遺非齊之何憲乎於學

多所諳記湘東王以四部書目試之自甲至丁卷中各對一事且及於作者姓名非梁之臧嚴乎暗寫漢書五行志略無遺脫非梁之陸倕乎答劉顯漢書十事之問無所疑滯非梁之韋載乎博綜羣書沈約任昉以下每有遺忘皆從訪問而能識楮酒之字知作譜之因記荷索千里酒之事又非梁之劉杳乎元魏闕駟於三史羣言經目則誦之時人有宿讀之譽隋王劭之在齊時答祖孝徵等古事之問具論所出而取書驗之一無舛誤

唐李邕謁李嶠求見秘書未幾辭去而李嶠試問之際
奧篇隱帙了辯如響呂向即市閱書而記問之敏至於
能通古今韋述觀元行沖數車之書而於前世之事熟
復詳諦如指諸掌張巡讀書不過三復終身不忘而
士卒居人一見問其姓名後無不識唐德宗詢凌烟閣
壁文之缺無能知者而蔣義以為聖歷侍臣圖贊口誦
帝前不失一字遂使德宗歎息有虞世南默寫列女傳
不能過此之言古者又有策士之法梁沈約策以經史

十事者劉顯也而顯對其九梁湘東策以百事者張綰也而綰之對止缺其六故有百六之目此皆博於記誦者也鄭子產答韓宣子黃熊之問而知鯨之化為黃熊答叔向實沈臺駘之問而知堯遷閼伯於商丘而主辰遷實沈於大夏而主參晉蔡墨因龍見於絳而言豢龍御龍氏之源周內史因神降于莘而謂祝融禱杌驚鷩應三代之興束皙論曲水而知羽觴隨波金人捧劍之事此皆博於古事者也子夏聞讀史記者有晉師三豕

渡河之誤而辨其為己亥之字晉荀勗撰次汲冢竹書
以為中經而列之於秘書東晉觀汲冢之書而隨疑分
釋皆有義証齊王僧虔見楚冢簡書而知其為科斗書
考工記周官之所缺之文若夫議美陽之鼎而識其為周
室褒賜大臣與其子孫之刻銘先功者則漢之張敞也
觀缺簡而識其古文尚書所刪之逸篇觀古器而能讀
其隱起之文無有疑滯者梁之劉顯也於齊永明時而
能辨襄陽竹簡古書為周宣之前者江淹也於梁武帝

時而能辨鄱陽王真本漢書之偽者劉之邁也辨旬服黃鍾之銘則唐之鄭欽說也此皆博於古文者也晉昭子問少皞官名於郊子告以黃帝以來紀官之制後漢應劭博覽多聞著漢官禮儀故事而朝廷制度多劭所立若無書不讀長於漢書舊典則蜀之孟光也祖宗制度之遺指掌畫地舉手可採則蜀之胡潛也博物多識問無不對而能興造制作則魏之王粲也博究儒術而羊祜等分定禮儀律令皆先諮而後施用則晉之鄭冲

也練習朝議世相傳授並諳江左舊事而為王氏青箱之學則晉之王彪也朝儀舊典晉宋以來故事撰次諳憶無所遺漏理事之際決斷如流而自謂江左風流宰相若晉謝安之比則有若齊之王儉焉博涉多通尤悉魏晉以來故事沈約謂其諳博雖胡廣無以加則有若齊之范岫焉歷任三代該悉舊章博物洽聞當世取則有若梁之沈約焉博通經史多識前載王儉居職以後莫有逮者朝儀國典皆預圖議則有若梁之徐勉焉詳

練故事自晉宋起居注亦能記誦梁武帝每訪前事即以所問隨機斷決而任昉則有讀誦之號則又有孔休源者焉以至元魏之鄧彥海明解制度多識故事唐之蘇瓌多識臺省舊章一朝格式咸所刪正此皆博於典故者也元魏崔浩總覈天人之際舉其綱紀者數家多有應驗故其推熒惑之失而知其入秦之分推三陰用兵之義而知蠕蠕之必克高允論漢元年十月五星聚東井而謂金水二星無因背日而行崔浩始雖不服及

加攷究乃以前三月聚于東井果如允之所言此非博
於天文者乎漢夏侯勝舉洪範傳厥罰常陰之証而霍
光張安世益重經術之士梁丘賀筮旄頭劍墮之異而
宣帝以其應加近幸之禮京房分六十四卦更直日用
事以風雨寒溫為候而各有占驗此非博於陰陽卜筮
者歟昔裴秀為禹貢地域圖其體有六而因地制宜以
校險夷之異潘京辨武陵郡名而知其改於漢光武之
時齊崔慰祖答謝朓地理十餘事之問而酬據精悉

眇遂有班馬復生無以過此之歎梁裴子野能知白題
滑國之所自出唐李百藥能知琅邪刈稻之所本以至唐
許敬宗古長城之對昆明池之對帝丘濟水之對條陳
不差賈耽于天下地土山川必究知之故有隴西山南
之圖洮湟甘涼之錄而海內華夷古今郡國亦莫不有
圖宋劉敞使於虜中亦能以松亭徑易之路質其譯者
使之相顧駭愧此非博于地理歟

博洽下

季桓子得土羊之異而仲尼辨之以為羶羊夫差得骨
節專車之異而仲尼辨之以為防風氏之骨陳有隼貫
楛矢之異而仲尼辨之以為肅慎之矢聖人之博物通
理固非常人之所能及也然古之君子凡所謂博物亦
豈無其人乎如管仲識兪兒為登山之神而謂霸王之
君興介葛盧聞牛鳴而知其生三犧之驗展禽識海鳥
為爰居而譏臧文仲之妄祀史趙以亥有二首為絳縣
老人之年而士文伯能知其數東方朔識建章騶牙而

知遠方之來歸終軍識豹文鼯鼠而為漢武之所賞二
事漢書無之晉實伋亦識鼯鼠而據爾雅以答世祖之
問則亦可以為博矣後漢賈逵証神雀以為降胡之証
顯宗時有神雀五采色帝以達博物多識問之對曰
宣帝威懷戎狄神爵乃集此降胡之証也帝勅蘭臺給
筆札使作神雀頌

魏王粲識舊佩而復為玉佩之法周廟歌器漢末不存
而晉之杜預則能創意造之當時朝野以其習中無所

不有而美之以武庫之號若張華之在晉則為尤博者
馬華強記默識四海之內若指諸掌而又雅愛典籍天
下奇秘悉在其所由是博物洽聞世無與比武帝問漢
宮制度及建章千門萬戶則應對如流畫地成圖時人
比之子產而龍肉之異則華能知之化生之驗則華能
知之臨平石鼓槌之無聲者取於蜀桐之叩豐城寶劍
若龍泉太阿者得於紫氣之祥則又非華莫能識之以
至指南車之轉於銅機歌器之合於魯廟者齊之祖冲

之也觀白鳥之獻而知其敬宗廟之應者齊之范雲也論
宗廟之犧尊而以齊尊之牛形為古之遺制者梁之劉
杳也識人日之名而用董勛答問以明其說者則若元
魏之魏收答太宗雉集之問而能知秦文公漢光武之
祥則若唐之褚遂良辨北虜之駁而誦山海經管子之
書以曉之則若宋朝之劉敞不特此也齊陸澄能辨古
器為服匿之名而知為單于與蘇武之器唐元澹之能
辨別銅器為晉阮咸之作此皆所謂博物者也後漢蔡

邕知夔桐之美而取為焦尾之琴聽鼓瑟之音而知其
有殺心之兆晉荀勗識趙之牛鐸而樂音果諧識宮聲
之鐸振於空地而得鍾以成衆樂之和則唐李嗣真實
能之見按樂之圖而辨其為霓裳之三疊則唐王維實
能之見岑陽古鍾而識其為姑洗之角則唐楊收實能
之茲非博于樂乎該綜百氏皆避其諱則徐勉以知名
於梁尤明姓系自魏晉以降推本其來皆有條序則路
敬淳以知名於唐通姓氏學世號肉譜虞世南歎其可

畏而美之為人物志則又李守素之所以顯於唐者茲
非博于譜牒者乎如學天官于唐都受易于楊何習道
論于黃子而為六家指要之論則有若司馬談者焉積
思經術晝誦書傳夜觀星宿著新序說苑及洪範五行
傳論則有若劉向者焉講六藝傳記諸子賦詩數術方
伎無所不究而集六藝羣書別為七略攷定律歷著三
統歷譜則有若劉歆者焉後漢王景廣闕衆書又好天
文術數之事深沉多藝班固博貫載籍九流百家之言

無不通究延篤博通經傳百家之書有名京師劉寬學
歐陽尚書京易韓詩而星官風角算歷皆究極師法號
為通儒樊英習京氏易兼明五經而風角星算河洛七
緯推步灾異皆其所善徐穉學嚴氏春秋京易歐書而
風角算歷河圖七緯亦所兼綜兩漢儒者自經傳之外
其他所習者如翟方進之好天文星歷蔡邕之好術數
天文鄭玄之通三統歷九章算術任安之兼學圖讖中
屠蟠之兼明圖緯皆炳然可見者內總朝政外供軍旅

決斷如流賓客輻湊內外諮稟目覽訴訟手答牋書耳
行聽受口並酬應不相參涉悉皆瞻舉則有若宋之劉
穆之者焉博覽經史陰陽百家之言精於天文之會自
朝廷禮儀策詔軍國書記無不闢總而留心於制度科
律長於計謀自比張良而謂其稽古過之則莫若於元
魏之崔浩梁顧野王遍觀經史精記默識而天文地理
著龜占候蟲篆奇字無所不通後周沈重學業該博為
世儒宗而陰陽圖緯無不通涉隋劉焯以儒學知名賈

馬王鄭所傳章句多所是非而九章筭術周髀七曜推步日月之經量度山海之術莫不窮其秘奧劉光伯於周禮等十三家之義並堪講授史子文集嘉言美事咸誦于心天文律厯窮數微妙凡此皆於經傳百家號為兼通而不以一藝自名者也

氏族

古者有姓有氏有族姓出於一而百世不可易者謂之姓別其枝派各取以為號者謂之氏合而言之

派之所出者謂之族如齊本姜姓則姜氏之正派者便是呂氏其他如申國許國之類雖同出於姜姓而枝派却別後世姓氏淆亂俱失其從來今之姓方古之氏也

古者天子建國賜姓命氏姓氏所以別其族類之所出也自三代之衰稱姓者以國或以族或以地或以官子孫各本於其祖不可改也後世非有親者附之屬籍或加於盜賊夷虜以逆賊異類為同宗然則古

之賜姓者別之今之賜姓者亂之也夫為天親不可以人為而強欲同之豈循禮乎上瀆其姓下忘其祖非先王之制不可為後世法也

裴駟注史記帝紀曰天子賜姓命氏諸侯命族族者氏之別名也姓者所以統繫百世使不別也氏者所以別子孫之所出也故世本論篇言姓則在上言氏則在下古書所稱百姓皆謂百官蓋民無姓也唐張說曰古未有姓自炎帝之姜黃帝之姬始因所生地而為之姓其

後天子建國因生以賜姓黃帝二十五子而得姓者十四德同者姓同德異者異左氏春秋傳言天子建德因生以賜姓胙之土命之氏諸侯以字為氏以謚為族堯賜伯禹姓曰姁氏曰有夏伯益姓曰姜氏曰有呂下及三代官有世功則有官族邑亦如之後世或氏於國則齊魯秦吳氏於謚則文武成宣氏於官則司馬司徒氏於爵則王孫公孫氏於字則孟孫叔孫氏於居則東郭北門氏於志則三烏五鹿氏於事則巫乙匠陶於是受姓

命氏燦然衆矣枝分派別初若參錯徐而攷之有綱有條猶指諸掌孟仲季臧同出於魯也

穆伯子文子僖伯

游國豐印同出于鄭也

吉參卷童父

向華蕩樂同出於

宋也

宜督父意諸呂

欒高崔國同出於齊也

子雅僕大

歸父

如陳伯袁之後而為袁氏齊公子高之後為高氏

衛公子衛孫之後為孫氏魯閔子騫之後為騫氏是以

美之字為氏也如文王封子聃叔於沈故其後為沈氏

晉穆叔封少子成師於韓故其後為韓氏晉獻公封畢

萬於魏故其後為魏氏越之後食於歐山之陽而為歐陽氏是皆以所封之邑為氏也如黃帝之子能制弓矢為弓之長因為張氏周史佚也世守其官因為史氏周平王少子有文在手曰武因為武氏金日磾以獲匈奴祭天金人因以為金氏是皆以一時之事為氏者也此數者皆以表功德明人倫奈何至其久則不然故聲相近則訛其聲字相近則訛其字如夏啓封支子於莘而其後為辛氏周武王封虢叔於西虢而其後為郭氏

是皆以聲相近而訛其姓也如邾子之後去邑而為朱氏邾氏之後去邑而為于氏皆以字相近而訛其姓也甚者如趙奢因封馬服君其後轉而為馬婁敬因漢高祖所賜其後轉而為劉氏田千秋因乘小車遂轉而為車氏灌夫因以灌嬰所薦遂蒙而為灌氏京房吹律而為京氏陸羽筮易而後為陸氏吳是本儀氏儀也因孔融之朝而改曰是晉嵇康本奚姓也因家嵇山而改曰嵇束皙本疏廣之後因避難而改為束賀循本慶普之

後因避諱而改為賀第五倫其先齊諸田之族也田氏之族衆以次為氏而因曰第五左思其先齊之公族也以其左右公子之名故因為氏而改曰左是又皆率意以更其姓也至其後世相去既遠又安能辨其祖之所自出邪夫祁氏一族至堯別而為陶唐氏至夏別而為御龍氏至商別而為豕韋氏至周別而為唐杜氏至晉別而為范氏至秦別而為劉氏凡六別其姓焉媯氏一族至舜別而為姚氏至胡公別而為陳氏至敬仲奔齊

別而為田氏至齊王建之子別而為王氏凡四別其姓
焉是豈非姓多而訛其族乎今夫杜氏一姓也惟杜伯
之後不遷者為杜城杜氏至漢建平侯延年之後則為
京兆杜氏晉當陽侯翦之後則為襄陽杜氏如子寬之
後則為亘之杜氏赫子威之後則為濮陽杜氏是杜氏
一姓而五望也張氏一姓也而常山王氏之後則為河
間張氏留侯良之後則為武城張氏北平侯之後則為
中山張氏後漢廣陵太守綱之後則為馮翊張氏後漢

蜀郡太守睦之後則為吳郡張氏晉司空華之後其一徙居河東則為河東張氏其一徙居河南則為河南張氏漢相安世居繁水則為魏郡張氏唐相鎬世居平原則為汲郡張氏唐相亮又為鄭州張氏是張氏一姓而十望也劉氏一姓也而楚元王交之後則為南華劉氏景帝弟子趙欽肅王之後則為廣平劉氏長沙定王之後則為南陽劉氏光武子廣陵恩王之後則為臨進劉氏章帝子河間孝王之後則為尉氏劉氏唐相文靜唐

相瞻則為彭城劉氏是劉氏一姓而六望也若是則豈非望多而訛其姓乎非特此也至其弊則若河南劉氏則出於匈奴冒頓能無累於劉漢之後乎安東王氏則出於阿布思營州王氏則出於高麗能無愧於周齊之後乎柳城李氏則出於契丹代北李氏則出於沙陁李正己則出於高麗李寶臣則出於奚種能無媿於臯陶之後乎此後世之弊也蓋自秦滅學之後公侯子孫失其本末漢興司馬遷乃約世本修史記因周譜明世家

乃知姓氏之所由出虞夏商周昆吾大彭豕韋齊桓晉
文皆同祖也更王迭伯漢高祖徒步有天下命官以賢
詔爵以功誓曰非劉氏無功而王者天下共誅之遠至
公卿之胄才則用不才則棄之不辨士與庶族然則始
尚官矣然猶徙山東豪傑以實京師舉諸田屈景皆右
姓也魏立九品置中正尊世胄卑寒士權歸右姓晉宋
因之于時有司選舉必稽籍而考其真偽故官有世胄
譜有世官由是有譜局令史江左則僑姓王謝袁蕭為

大東南則為吳姓朱張顧陸為大山東則為郡姓王崔
盧李鄭為大關中亦號郡姓韋裴柳薛楊杜首之代北
則為虜姓元長孫宇文首之虜姓者魏文遷洛有八氏
十姓三十六族皆其宗屬部落也郡姓者以中國士人
差第閥閱為之制曰膏粱曰華腴而又有甲姓乙姓丙
姓丁姓謂之四姓北齊因仍凡舉秀才非四姓不在選
中唐太宗以山東士人尚閥閱雖族已衰而子孫猶負
世望至有賣婚之弊由是詔高士廉等攷天下之譜牒

進忠良退凶惡先宗室後外戚退新門進舊望左膏腴右寒畯合為九等號曰氏族志夫自秦漢以來氏族之制出於上之所賜下之所更者絕無而僅有至於世守一氏待千餘年而不變其別非若古之多然人罕有辨氏族之原者如王氏一也吾不知其出於元城之王邪宜春之王邪邛城之王邪劉氏一也吾不知其出於陶唐之劉邪見高祖贊奉春之劉邪元海之劉邪晉趙元本匈奴其能明辨而不惑者鮮矣氏之馬者未必能

辨其為馬服之馬及馬矢之馬也

後漢馬隆先本馬矢

氏氏之石者未必能辨其為周之石

周石速衛之石

石碣

及後趙之石也古之氏族繁而知之者反多今之

氏族簡而知之者反少其說果安在邪蓋由譜牒之明

與廢也竊考自古善論姓氏者魯有衆仲晉有胥臣鄭

有行人子羽皆能探討本原自炎黃而下如指諸掌後

世如漢鄧氏官譜應劭風俗通王符潛夫姓氏篇晉摯

虞之族姓昭穆賈弼之姓氏簿晉太元中賈執之姓氏

英賢宋何承天之姓苑王僧孺之百家譜唐柳沖之姓
系錄韋述之開元譜柳芳之永泰新譜李守素之肉譜
蕭穎士孔至之百家類例皆以名儒世學疲精歲月而
後成書唐張九齡而下至宋諸儒益盡信之然而因陋
就誣不可以訓自應劭以來所著大議如齊秦晉楚本
非國姓亂其族系他姓尚多有之良由應劭一誤後世
相沿未知有改故也獨林寶作元和姓纂稍能是正歐
陽修作唐宰相表凡九十三族尤為精詳至鍾陳韓高

之氏亦有訛舛近世名儒又有作古今姓氏辨證之書者此譜牒之學也昔李義府不得與於李崇德之譜乃傳致其罪杜正倫不能齒於城南之譜乃鑿通其渠今欲定譜牒而核偽真使天下後世知所以尊祖敬宗之道必能因其所是正其所非以刊一定之書如成周小史之所職者以頒行於天下俾天下明其本系之所自出則世系之混殽昭穆之紊亂其何慮歟

羣書考索卷三十四

欽定四庫全書

羣書考索後集卷三十五

宋 章如愚 編

姓門

姓

書曰錫土姓

國語曰司商協名姓

言商掌賜族受姓之官商金聲清謂人始生吹律合

之定其姓名

又曰昔少典生黃帝炎帝

少典者諸侯國號稱人名也

黃帝以姬水成炎帝以姜水成成而異德故黃帝為姬
炎帝為姜

史記曰黃帝二十五子得姓者十有四人晉司空季子
曰黃帝之子二十五宗其得姓者十四人為十二姓

姬 酉 祁 已 滕 箴

任 荀 僖 姑 嫗 依

惟青陽與林氏同于黃帝故皆為姬姓

史記夏義曰禹為姬姓其後分封用國為姓故有夏后氏有扈氏有男氏斟尋氏彤成氏褒氏費氏和氏繒氏辛氏冥氏斟氏戈氏

殷贊曰契為子姓其後分封以國為姓有殷氏來氏宋氏辛桐氏稚氏北殷氏目夷氏

周語曰伯禹疏川道淵鍾水豐物皇天嘉之祚以天下

賜姓曰姒氏曰有夏謂其能以嘉祉阜生物也祚四
岳國命為侯伯賜姓曰姜氏曰有呂謂其能為禹股
肱心膂以養物豐民人也

左傳襄十年瑕禽曰昔平王東遷吾七姓從王

漢高帝賜婁敬姓劉氏

唐高祖賜徐世勣李氏終漢之世有易姓如衛青之徒
其後劉元海本匈奴種以冒頓與漢和及其外祖遂
謂姓劉其弊至此豈非高帝有以啓之歟

唐世人主非其親者附之屬籍或加於夷狄盜賊以逆
賊異類為同宗其弊至此豈非唐高祖有以啓之歟
范祖禹曰古之賜姓所以別之今之賜姓適以亂之

氏

左傳襄二十四年范宣子謂穆叔曰昔句之祖自虞以
上為陶唐氏

在夏為御龍氏

在商為豕韋氏

豕韋國名東郡白馬縣東南有韋城

在周為唐杜氏

唐杜二國名殷末遷豕韋國於唐周成王滅唐遷之於杜為杜伯杜伯之子隰叔奔晉四世及士會食邑於范復為范氏杜今京兆杜縣

晉主夏盟為范氏

禮書曰古者或氏於國則秦魯齊吳氏於謚則文武成宣氏於官則司馬司徒氏於爵則王公王孫氏於字

則孟孫叔孫氏於居則東郭北門氏於志則三鳥五鹿氏於事則巫乙匠陶而受姓命氏燦然著矣

馬援其先趙將號曰馬服君子孫因以為氏 魯恭其先魯顏公為楚滅遷於下邑因氏焉 樊宏其先周仲山甫封於樊因氏焉馮魴其先魏之支則食采馮城因氏焉 宋暉其先微子之後也周衰諸侯滅宋奔碭易姓為宋本傳注姚策

族

書堯典曰以親九族九族既睦高祖九族之親
皐陶

謨曰惇叙九族仲虺之誥曰志自滿九族乃離

詩葛藟刺平王也棄其九族焉
角弓刺幽王不親九族也行葦內睦九族

周禮小宗伯掌三族之別

禮記仲尼燕居曰閨門之內有禮故三族和
三族父子

孫也

周禮太宰宗以族得氏
大宗伯以飲食之禮親宗族

兄弟

陳禮書曰書與詩序皆言九族 周禮小宗伯儀禮
士昏禮記仲尼燕居特言三族者三族父子孫也九
族高祖至玄孫也三族舉其本九族極其末舉三族
則九族見矣白虎通夏侯歐陽何琦如淳之徒以父
族四母族三妻族二為九族其說蓋以詩之葛藟刺
平王不親九族而言謂他人父謂他人母頍弁刺幽
王不親九族而言豈伊異人兄弟甥舅角弓亦刺不

親九族而言兄弟昏姻無胥遠矣則所謂九族者非特內宗而已是惡知詩人之所主者因內宗而發哉彼謂父族四者父之姓為一族父女昆弟適人者子為二族己女昆弟適人者子為三族己女適人者子為四族母族三者母之父母為一族母之昆弟為二族母之女昆弟為三族妻族二者妻之父為一族妻之母為二族然於母之母則合而為一族妻之父母則離而為二可乎魯桓公六年隨季梁曰親其九族

以致其禋祀杜預注曰九族謂外親祖母從母子及妻父妻母姑之子姊妹之子女子之子并已之同族皆外親有服而異族者也爾雅於內宗皆曰族於母妻曰黨而已又禮小功之未可以嫁娶妻之黨固無妨於嫁娶昏禮不容慮其不虞也然則九族之說當以孔安國鄭康成為正何則小記曰親親以三為五以五為九上殺下殺旁殺而親畢矣此九族隆殺之差也蓋以上親父下親子三也以父親祖以子親孫

五也以祖親魯高以孫親魯玄九也

宗

左傳定四年祝鮀曰成王選建明德以蕃屏周分魯公以殷民六族條氏徐氏蕭氏索氏長勺氏尾勺氏使帥其宗氏輯其分族將其類醜以法則周公用即命于周分康叔以殷民七族陶氏施氏繁氏錡氏樊氏饑氏終葵氏分唐叔以懷姓九宗職官五正

隱六年翼九宗五正頃父之子嘉父逆晉侯于隨

注云五正五官之長大宗一姓為九族也

自唐始分世為晉世強家及晉襄卒得強家之力此宗法之所以善也

又叔向云羊舌之宗十一族亦此類也

大宗 小宗 百世不遷之宗 五世則遷之宗

大傳曰別子為祖繼別為宗繼禰者為小宗有百世不遷之宗有五世則遷之宗百世不遷者別子之後也宗其繼別子之所自出者百世不遷者也宗其繼高祖者

五世則遷者也

禮書曰百夫無長不散則亂一族無宗不離則疎先王因族以立宗敬宗以尊祖故吉凶有以相及有無得以相通尊卑有分而不亂親疎有別而不貳儀禮所謂不貳斬之類貴賤有繁而不簡文王世子曰雖

為庶人冠取妻必告然後一宗如出乎一族一族如出乎一家一家如出乎一人此禮俗所以行而人倫所以厚也蓋公子不得稱先君故為別子而繼別者

族人宗之為大宗雖遠至於絕屬猶為之服齊衰三月母妻亦無庶子不得祭祖故諸兄弟宗之為小宗以其服服之大宗遠祖之正體則一而已小宗高祖之正體其別有四則繼禰者兄弟宗之繼祖者從兄弟宗之繼曾祖者從祖兄弟宗之繼高祖者族兄弟宗之四世則親盡屬絕而不為宗矣既已無服遂易其宗所謂五世則遷之宗然言繼別為宗又言繼別子之所自出者言繼禰為小宗又言宗其繼高祖者

則繼別者別子之子也繼別子之所自出者即別子也繼禰者庶子之子也繼高祖者五世之孫也繼禰言其始繼高祖言其終繼禰言其宗繼別子之所自出言其祖經言繼別子之所自出而孔穎達言別子之所由出然則別子所由出即國君也其可宗乎穀梁曰燕周之分子也分子即別子也然別子不特公子而已有來自他邦而為卿大夫者亦謂之別子有起於民庶而為卿大夫者亦謂之別子

有小宗而無大宗 有大宗而無小宗 有無宗
而莫之宗

諸侯之公子上不得宗君下未有後世之宗必有以統
之故有三者之宗道也君無適昆弟使庶昆弟一人
為宗統公子禮如小宗故曰有小宗而無大宗君有
適昆弟使之為宗以統公子不復立庶昆弟為宗故
曰有大宗而無小宗公子一而已無公子可宗亦無
公子宗之故曰有無宗亦莫之宗

說者曰陳國錄云太宰以九兩係邦國之民曰宗以族得民蓋綴之以族王者所以一天下後世徒蔽於害而莫見其利遂使先生良法美意不可復用如商之七族實封康叔懷姓九宗實封唐叔必曰世家大族有害於國豈成王不仁於二國哉是必強宗大族禮義足以齊其家而好尚足以率其俗正有國者之所共治者此孟子所以拳拳于巨室也不幸魯之桓齊之田并國逐君遂致大家為不可容漢人主都關中

遂徙齊諸田楚昭王屈而武帝以六條訪察自以強
宗豪右為言陵夷至於晉士大夫猶有羣聚而族起
者不幸五胡亂華奔逸四出至元魏分析蔭戶而先
王宗以族得民之事始散而不可復收矣

禮記載大宗之法皆古大夫之家有采地者也蓋嘗論
之天下有大宗天子是也國有大宗諸侯是也家有
大宗大夫是也天子既為天下宗矣而王子王孫之
又為諸侯則猶為一國之宗諸侯既為一國之宗矣

而公子公孫之為大夫則猶為一家之宗若士庶人有升而為大夫則一家之人宗之大夫有進而為諸侯則一國之人宗之諸侯有黜而為大夫則宗其為諸侯者而已不得為宗大夫有廢而為士庶人則宗其為大夫而已不得為宗至於公族疎遠而為士庶人則皆宗於人者也舉天下之人已不為宗則宗於人未有獨立而無宗者也

季雅

東坡曰古者立宗之道嫡子既為宗則支庶子之嫡子

又各為庶子之宗其法止於四而其實無窮自秦漢
以來天下無世卿大宗之法不可以復立而其可以
收合天下之親者有小宗之法存而莫之行者此甚
可惜也今夫天下所以不重其族者有族而無宗也
有族而無宗則族不可合族不可合則雖欲親之而
無由也族人而不相親則忘其祖矣今世之公卿大
臣賢人君子之後所以不能世其家如古之久遠者
其族散而忘其祖也故莫若復小宗

李氏曰別子謂公子若始來及在此國者後世以為祖也別子之適子適子世世繼別子為大宗然小宗上盡於高祖則遠者忘之矣旁盡於三則疏者忘之矣故立大宗以承其祖族人五世外皆合之宗子之家序以昭穆則是始祖常祀非孝乎同姓常親非睦乎重宗者尊祖之義也

異同

嘗按左氏之書子長之史記其載諸國姓氏與夫世裔

皆有可疑者春秋之時諸侯之國凡一百十五可以知其姓與爵者四十有六晉楚之類是也可以知其姓而不可以知其爵者一十有八焦陽之類是也可以知其爵而不可以知其姓者一十有七沈之類是也其爵其姓皆不可得而知者三十有六鮮虞陸渾之類是也不知其姓不可得而見之矣而知其姓者又不可究信如以趙為芊姓而子長又以為姬姓以祁姓鄆國為重黎之後又以為吳國之後此其言異

同固不足論至於姜氏為伯夷之後又以為四岳之
後是其言自相異同矣舜之咨四岳有能典朕三禮
僉曰伯夷若以四岳為伯夷則是自薦其才也豈其
然乎此左氏之言姓氏所以為可疑者也子長之史記
始於黃帝迄於漢武天子世次見於帝紀諸侯世次
見於世家夏之後則為杞商之後則為宋以其世家
本紀併而攷之則其苗裔歷歷而可考至於滕薛邾
邠之屬雖其事見於春秋而其世次之不傳者又不

可盡信堯乃舜之從高祖而舜乃妻其女鯀乃舜五世從叔公與舜同為堯臣湯與王季同世也湯下傳十六世而為紂王季傳一世而為文王二世而為武王則是文王以十五世祖而臣事十五世孫紂武王以十四世祖而伐十四世孫紂而伐之必不然矣此子長之論世裔所以為可疑也大抵去古既遠抱舛承訛無所取正左氏猶然況子長乎子長猶然況班固以下乎左氏以嬴姓為伯翳之後班固又以為伯

益之後韋昭遂以伯益即伯翳也孔穎達復以伯益為臯陶之子愚嘗按史記之文臯陶之後封蓼六伯翳之後封秦垂伯益之後不知所封是則伯益伯翳臯陶各為一族翳與益不得為一人而益不得為臯陶子矣

漢之興本於亭長而以為出於唐堯曹魏之興肇於宦官而以為出於曹叔振鐸唐之祖起於隴西狄道而以為出於老子臯陶此何異郭崇韜而拜郭子儀之

冢其不貽笑於君子者幾希矣傳臯陶為士未聞其
為大理而以理為李甚不經矣劉子元以漢為陸終
苗裔固以駁漢之非而高堂隆又以魏舜之後其繆
尤甚舜為媯氏其苗曰田安有魏氏耶有異姓而反
同者何與韓是也成王母弟唐叔虞之後封於韓韓
既失國子孫離析江淮之音以韓為何遂從其音以
為何氏此退之所以謂韓與何同姓而近也至於以
婁為劉是高祖一時之言無所經見婁者姁姓之後安

可與劉為一耶此則高祖之失也有同姓而反異者則以其姓雖一而所祖不同以杜為氏者有出於襄陽有出於京兆以王為氏者有出於太原有出於河東豈可與共譜哉而李義府不得與於李崇德之譜乃傳之致其罪杜正倫不得齒於城南諸杜乃鑿杜固渠者則天之罪也

總論

周禮小史莫世系辨昭穆左傳衆仲曰天子建德因生

以賜姓胙之土而命之氏諸侯以字為氏因以為族
官有世功則有官族邑亦如之禮書曰姓非天子不
可以賜而氏非諸侯不可以命姓所以系百世之正
統氏所以別子孫之旁出族則以氏之所聚而已然
氏謂之姓故大傳言係之以姓又言庶姓別於上則
氏與姓一也氏又謂之族故羽父為無駭請族隱公
命以為展氏則氏族一也蓋別姓則為氏氏則有族
族無不同氏氏有不同族故八元八凱出於高陽氏

高辛氏而謂之十六族是氏有不同族也商氏條氏
徐氏之類謂之六族陶氏施氏之類謂之七族宋之
華氏謂之戴族向氏謂之桓族是族無不同氏也

有因德而賜姓

四岳佐禹治水有功賜姓曰姜氏曰呂氏

有因土而賜姓

陳舜之後妯之受姓也本因舜之居于妯汭賜姓

曰妯

有因官而姓者

倉氏 庫氏 司空 司馬

有因邑而姓者

諸氏因於宋子召食采於諸而子孫承之易子為
諸

有因字之省文而易姓者

于氏出於姬氏之邛去邑而為于喬氏出姬姓之
橋去木而為喬

有聲音之相近而易姓者

辛本莘也辛莘相近莘遂為辛氏郭本號也郭號相近號遂為郭氏

有因見於丙殿而易姓者

丙本李也李陵之裔自匈奴歸魏見於丙殿故賜姓焉

有因文在手而易姓者

武氏出自周平王少子生而有文在其手曰武遂

以為氏

有因語音之訛而易姓者

宇文出自神農之後以其有嘗草之功自號為侯
汾氏其後訛而為宇文氏

有逃自竇出而易姓者

竇氏本姒姓也有仍逃出自竇故少康氏為竇

王氏之姓不一

王氏出自姬姓周靈王太子晉之後時人號曰王

家故曰王氏太原王琅琊王其後也又有出自畢
公高之後魏信陵公子孫時人以其故王族號曰
王家故為王氏

裴氏之姓不一

裴出風姓非子之裔孫封非邑卿故為非邑氏至
非後世去邑從衣為裴此一裴也晉平公封顓帝
之孫於裴中號裴君此一裴也此不可不辨

禮書曰方周盛時宗族之法行故常隸行葦之美作於

上角弓類升之刺不聞於下以此治國而國有倫以此係民而民不散則宗子之於天下豈小補哉及秦用商君之法富民有子則分居貧民有子則出贅上雖王公大人亦莫知有敬宗之道

秦興滅學而宗譜不立漢司馬遷修史記上述黃帝下迄麟趾採世本世系而作帝紀採周譜國語而作世家由是人乃知姓氏之所出西漢之間人皆有姓姓以國者韓陳許鄭魯衛趙魏最為多逮晉賈弼有

姓氏傳十八州百十六郡合七百二十二篇甄析士
類無所遺缺賈希鏡撰姓氏要狀賈執作姓氏英賢
齊宋譜牒之學浸興有司選舉必稽譜牒以考其真
偽官有世胄譜有世官分天下之姓而為四名過江
則有僑姓而王謝袁蕭為大東南則有吳姓而朱張
顧陸為大山東則有郡姓而王崔盧鄭為大關中亦
有郡姓而韋裴柳薛楊杜首之代北則虜姓而元
長宇文陸源竇首之以中國士人差第閥閱而為之

制遂分為甲乙丙丁之號焉夫以此言選舉以此考
賢才以此形品藻豈上世所以別姓氏之意耶甚者
至於賣婚而求財鑿杜而通譜悠悠風塵汨喪廉恥
此何理哉其間有欲懲其弊者復至於譜牒脫落迄
無考按而世數既遠終不知其何姓氏其失又甚焉
嗚呼綴之以姓系之以氏所以序昭穆別婚姻使天
下知敬宗尊祖而不忘本者古人之意也奈何漢尚
官魏晉尚姓南北尚詐隋人因仍而欺弊莫草漢高

帝命官以賢詔爵以公先王公卿之位才則用不才則棄斯尚官也魏立九品置中正尊也位卑寒素而權舉右姓此變官而尚姓矣晉宋因之以別貴賤分士庶選舉之際皆用譜牒至北齊凡舉秀才州主簿郡功曹必四姓乃其選也其尚詐又如此也文之弊至於尚官尚官之弊至於尚姓尚姓之弊至於尚詐隋承其後乃反古之道罷鄉舉離土著尊執事之史由是無鄉舉里選無衣冠士族而庶人替矣此唐太

宗所以命高士廉而定世族也初武德中李守素亦明姓氏謂之族譜貞觀中太宗命高士廉普責天下譜約史傳考其真偽進忠賢退悖惡先宗室後外戚右膏粱左寒畯凡二百九十三姓千六百五十一家分為九等號氏族志太宗曰我今定世族者欲崇我唐朝人物冠冕垂之不朽何容納貨舊門嚮聲背實而賣婚以為榮而遂以第一崔幹為第二高宗時許李更以吕才刊定改為姓氏錄當時恥焉號曰勲格

路敬淳有衣冠譜有著姓畧記長安中劉知幾撰劉氏譜三卷先天時復詔柳沖徐堅等討綴號姓族以開元時韋述好譜學於百氏源流為詳故作譜唐興言譜者以路敬淳為宗有衣冠譜柳公權韋述之與李守素亦明姓氏後有李公淹蕭穎士商寅孔聖為世所稱以宏詞及唐志會要修

通典載晉太元中賈弼大披羣族撰十八州百一十六郡合七百一十二卷士族畧無遺缺宋王洪劉湛並

好其書洪曰對千客不犯一人諱湛復選百家譜傷
於寡畧齊王僧孺又為八十卷東南諸族則為一部
不在百家之數

唐乾元元年賈至撰百家類例十卷


漢高祖嘗賜婁敬諸鎮皆以劉氏亦可謂知天子之
職矣然而知其職而未知其義故材陋少文不如元
魏孝文之長議論也

魏孝文賜喬氏則取其高遠改源氏則取其同源後

世帝者徒見英主所為意其駕馭豪傑或出于此於是跋扈之臣與夷酋賊渠例皆賜以國姓謂之固結其心而不知取笑貽辱無以示天下威重夫姓者出於天授於祖宗先聖以神明之德奄有天下以為神明萬物之主而嗣君乃屈帝尊以下同於三者之賤此當時公卿大臣不學之過也古之賜姓受氏不然天子之子常為顯諸侯諸侯之子常為名卿大夫至起於疏逖者又一時賢能才智之士其言行卓卓皆可

稱道求之於詩則齊之姜知其前有四岳而後有太
公宋之子知其前有成湯後有微子孟庸孟弋知為
衛之世族南方之原知為陳之名家求之春秋則施
臧季孟之氏於字戴武穆宣之氏於謚中行司城之
氏於官邱御秦費之氏於邑皆可以概見則三代之
典禮與後世沿襲之誤較然甚明而漢魏以來賜姓
附屬籍者不如不賜之為愈也

郡名世姓氏書序



羣書考索後集卷三十五

欽定四庫全書

子部

羣書考索後集卷三十六

詳校官中書臣竇汝翼

主事臣祁韻士覆勘

總校官知縣臣楊懋珩

校對官中書臣徐步雲

謄錄監生臣沈安邦

欽定四庫全書

羣書考索後集卷三十六

宋 章如愚 編

士門

分類總考

貢舉

周禮大司徒以鄉三物教萬民而賓興之一曰六德二

曰六行三曰六藝

鄉大夫三歲大比攷其德行道藝而興賢者能者鄉
老及鄉大夫帥其吏與其衆寡以禮禮賓之厥明鄉
老及鄉大夫羣吏獻賢能之書于王王再拜而受之
登于天府內史貳之退而以鄉射之禮五物詢衆庶
一曰和二曰容三曰主皮四曰和容五曰興舞此謂
使民興賢出使長之使民興能入使治之

州長三年大比則大考州里贊卿大夫廢興

黨正正歲屬民讀法而書其德行道藝以歲時涖校

比及大比亦如之

族師月吉屬民而讀邦法書其孝弟睦姻有學者

閭胥既比則讀法書其敬敏任恤者

並地官詳見選

舉門

秦自孝公納商鞅策富國強兵為務仕進之途惟闢田
與勝敵而已

始皇遂平天下

通典

漢高祖十一年詔曰賢士大夫既與我定有天下而

不與吾共安利之可乎有能從我遊者吾能尊顯之
以布告天下

後漢章帝建初元年詔曰夫鄉舉里選必累功勞今刺史守相不明真偽茂材孝廉歲以百數每尋前代舉人貢士或起猷畝不係閥閱敷奏以言則文章可採明試以功則政有異迹文質彬彬朕甚嘉之始復用前漢丞相故事以四科辟士

通典

魏文帝立九品中正法擇州郡之賢有識鑒者為之區

別人物第其高下

通典

黃初三年始除漢限年之

制令郡國貢舉勿拘老幼儒通經術吏達文法則皆

試用

通典

東晉元帝制揚州歲舉二人諸州各一人時以天下喪

亂務存慰勉遠方孝秀不復策試到即除署既經略

粗定乃詔試經有才不中舉者免其太守其後孝秀

莫敢應命送至京師皆以疾辭

通典

宋制丹陽吳會稽吳興四郡歲舉二人餘郡各一人凡

州秀才郡孝廉至皆策試天子或親臨之及公卿所

舉皆屬吏部叙才銓用

通典

文帝元嘉中限年三十而仕

通典

孝武即位仕者不復拘老幼

通典

齊尚書都令史駱宰議策秀才格五問並得為上四三

為中二為下一不合與第

通典

梁初無中正制年二十有五方得入仕

通典

天監中又制凡九流常選年未三十不通一經者不

得為官若有才同甘願勿限年次至七年州置州重
郡置郡崇鄉置鄉豪各一人專典搜薦無復膏粱寒

素之隔

通典

普通七年詔凡州歲舉二人大郡一人

敬帝太平二年復令諸州各置中正仍舊訪選舉皆
須中正選上然後量授不然則否

陳依梁制凡年未三十不得入仕唯經學生策試得第
後魏州郡皆有中正掌選舉其秀才對策第居中正

上表叙之

北齊選舉多沿後魏之制凡州縣皆置中正其課試之法中書策秀才集書策考貢士考功郎中策廉良天子常服乘輿出坐於朝堂中楹秀孝各以班草對字有濫誤者呼起立席後書有濫劣者飲墨水一升文理孟浪者奪席脫容刀

隋文帝開皇中制諸州歲貢三人工商不得入仕

煬帝始置進士科

唐貢士之法多循隋制上郡歲三人中郡歲二人下郡
一人有才能者無常數其常貢之科有秀才有明經
有進士有明法有書有算自京師郡縣皆有學焉並
具學篇通典○每歲仲冬郡縣館監課試其成者長
吏會屬僚設賓主陳俎豆備管絃牲用少牢行鄉飲
酒禮歌鹿鳴之詩徵耆艾叙少長而觀焉既餞而與
計偕其不在館學而舉者謂之鄉貢○又制取士之
科大要有三由州縣者曰鄉貢皆升于有司而進退

之。自是士族所趣嚮惟明經進士二科而已其初

止試策

並通典

太宗貞觀八年詔加進士試讀經史一部

通典

高宗調露二年劉思立始奏二科並加帖經其後又加老子孝經使兼通之

通典

武后長壽二年自製臣軌兩篇令貢舉習業停老子

同上

中宗神龍二年二月制貢舉人停臣軌依舊習老子

同上

舊制以考功郎中監試貢舉貞觀後以考工員外郎

專掌

同上

玄宗開元二十一年新注老子成詔天下每歲貢士減尚書論語策而加老子焉。二十四年制移貢舉於禮部以侍郎掌之。同上。二十五年其進士停經

天寶元年帖既通而後試文試賦各一篇文通而後試策凡五條三試皆通者為第一進士有甲乙二科

自武德以來進士惟乙科而已先試之期命舉人謁
于先師有司十日宿張于國學率輔以下皆會而觀
焉博集羣議講論而退之禮部閱試之日皆嚴設兵
衛荐棘圍之搜索衣服譏訶出入以防假濫焉其進
士大抵千人得第者百一二

開元以後四海宴清士無賢不肖恥不以文章達其
應詔而舉者多則二千人少猶不減千人所收百纔
有一並同上

肅宗乾元中禮部侍郎李揆病取士不考實徒務搜
索進所披而迂學陋生且不能自惜干詞乃陳書庭
中進諸儒約曰上選士第務得才可盡所欲言由是
人人稱美

本傳

寶應二年禮部侍郎楊綰奏諸州每歲貢人依鄉舉
里選察秀才先是進士試詩賦

德宗建中二年趙贊以箴論表贊代詩賦

文宗太和八年復試詩賦。從內出題以試進士謂

侍臣曰吾患文格浮薄昨日出題所試差勝乃詔禮部歲取登第三十人苟無其人不必充數

鄭覃疾進士浮薄屢請罷之文宗曰淳厚浮薄色色有之進士科取人二百年矣不可遽罷

唐志

武宗即位李德裕論進士不根藝實朝廷顯官須公卿子弟為之

唐志

宋太祖建隆元年二月丙戌先是中書舍人安次扈蒙權知貢舉庚寅奏進士合格者十九人姓名二年二

月癸酉權知貢舉竇儀奏

三月丙子權知貢舉王著奏進士合格者十五人九月丙辰詔及第舉人不得呼知舉官為恩門師門及自

稱門生

並見會要

乾德元年二月辛亥權知貢舉薛居正奏進士合格者八人八月壬辰詔禮部貢院所試九經舉人落第宜依諸科舉人例許令再試九月丙子詔禮部貢舉人自今朝臣不得更發公薦違者重寘其罪故事每

歲知舉官將赴貢院臺閣近臣得薦抱至藝者號曰
公薦然去取不能無所私至是禁止 乾德三年三
月丁酉權知貢舉陶穀奏進士合格者八人九月癸
未權知貢舉盧多遜言諸州所薦士數益多乃約用
顯德之制定發解條例及殿罰之式以懲濫進詔頒
行之 乾德三年二月丁巳權知貢舉盧多遜奏進
士合格姓名凡七人 乾德四年二月辛酉權知貢
舉王祐言進士合格者六人諸科合格者九人上恐

其遺才復令於不中選人內取其優長者策而升之
乾德五年二月壬申權知貢舉盧多遜奏進士合
格者十人復詔參知政事薛居正於中書覆試皆合
格乃賜及第 開寶元年三月癸巳權知貢舉王祐
擢進士合格者一人陶穀子邴名在第六翌日穀入
致謝上謂左右曰聞穀不能訓子邴安得登第遽命
中書覆試而邴復登第因下詔曰造士之選匪植私
恩世祿之家宜崇素業如間黨與頗文衡公器豈宜

欺濫自今舉人凡闕食祿之家委禮部具析以聞當
覆試長編

前輩謂進士一科為將相科王曾則其人可知也
當時取士兼採譽望廷唱或先審人物有以翰林
學士之子而命覆試者陶穀之子炳有以宰相參
政之子弟而皆罷之者李昉之子宗呂蒙正之弟
蒙亨有以升黜未公而再行考試者王曾等言有
以取舍非當至擊鼓自陳者徐士庶有以賦落韻

特取之者李迪有以注疏異說而特黜之者賈邊
有以上書可用而通榜皆為通判者張齊賢有以
儀狀秀偉而召見擢為第一者蔡齊國初取士之
際猶不拘於法也或欲罷封彌之法范仲淹范鎮
等或欲隆學校之教歐陽修或欲還田里之選趙
師民或欲置經明行修之科司馬光皆欲考其素
履兼採譽望如國初之制然時異事變難於卒行
則亦相視太息而已

開寶三年二月甲子權知貢舉趙逢奏進士合格者
十人安德裕等

此據會要登科記其日丁卯是春車駕親征不知
何緣不停舉趙逢尋亦為隨車轉運使豈即於行
在所取士乎

冬十月丁亥詔西川山南荆湖等道自今發遣舉人
往來並給券 開寶三年三月壬寅朔詔禮部貢院
閱進士諸科十五舉以上曾經終場者以名聞甲辰

得司馬浦等六十三人庚戌復取十五舉未經終場者四十三人並賜出身仍詔自今勿得為例權知貢舉扈蒙擢進士合格者八人 開寶四年二月辛卯知制誥盧多遜權知貢舉扈蒙奏合格者十人 開寶五年閏二月壬辰權知貢舉扈蒙奏合格進士京兆安守亮等十一人諸科十七人上名對於講武殿始詔制放榜新制也十一月己巳詔諸道舉人自今並於本貫州府取解不得更稱寄應如從化外至者

先投牒開封府奏請得旨方許召試 開寶六年三月辛酉新及第進士雍邱宋準等十人詔科二十八人詣講武殿謝上以進士武濟川材質最陋應對失次絀去之濟川翰林學士李昉鄉人也昉時權知貢舉上頗不悅會進士徐士廉等擊登聞鼓訴昉用情取舍非當上以問翰林學士盧多遜曰頗亦聞之上乃令貢院籍終場下第者姓名得三百六十人癸酉皆召見擇其一百九十五人并準以下及士廉等各

賜紙札別賦詩賦命殿中侍御史李瑩左司員外郎
侯陟等為考官乙亥上御講武殿親閱之得進士二
十六人士廉與馬五經四人開元禮七人三禮三十
八人三傳二十六人三史三人學究十八人明法五
人皆賜及第又賜準錢二十萬以張宴會責昉為太
常少卿考官右贊善大夫楊可法等皆坐責自茲殿
試遂為常式 夏四月乙酉詔諸州考試官令長吏
精選僚屬有才學公正者充知貢舉與考試官同看

詳義卷定其通否否即駁放不得優假虛至終場申
禁私薦屬舉人募告者其賞有差舉人勒還本貫重
役永不得入科場 開寶七年三月詔權停貢舉開
寶八年二月丁卯知制誥王祐權知貢舉知制誥扈
蒙左補闕梁周翰祕書丞雷德驤並權同知貢舉命
權同知貢舉始此戊辰上御講武殿覆試王祐等所
奏合格舉人王式等因語之曰向者登科名級多為
勢家所取致塞孤貧之路甚無謂也今朕躬親臨試

以可否進退盡革疇昔之弊矣式等皆頓首謝於是
內出詩賦題試得進士王宗以下三十人諸科三十
四人八月辛酉詔停今年貢舉十二月甲子詔貢士
之下第者特免將來請解許直詣貢部

太宗太平興國二年正月丙寅上初即位以疆宇至
遠吏員益衆思廣振淹滯以資其缺顧謂侍臣曰朕
欲博求俊乂於科場中非敢望拔十得五止得二三
亦可為致治之具矣先是諸道所發貢士凡五千三

百餘人命張洎石熙載試進士侯陶等試諸科侯涉
監之禮部上所試合格人名戊辰上御講武殿出詩
賦題覆試進士賦韻平仄相間依次用命翰林李昉
扈蒙定優劣為三等得河南呂蒙正以下一百九人
庚午覆試諸科得二百七人並賜及第詔禮部閱貢
籍得十五舉以上進士及諸科一百八十四人並賜
出身九經七人不中格上憐其老特賜同三傳出身
凡五百人時先賜綠袍鞋笏錫宴開寶寺上自為詩

章賜之唐時禮部放榜之後釀飲於曲江號曰聞喜宴五代多於佛舍名園周顯德中官為主之上命中使典領供帳甚盛第一第二等進士并九經授將作監丞大理評事通判同出身進士及諸科並送吏部免選優等注擬初資職事判司部尉龍章殊異歷代所未有也

初太祖幸西京洛陽人張齊賢獻下并汾富民封建敦孝舉賢太學籍田選良吏懲奸謹刑十策太祖召

見問之齊賢以手畫地條陳太祖善其四策齊賢堅執其餘策皆善太祖怒令衛士曳出及還語上曰我幸兩京惟得一張齊賢我不欲遂官爵之汝異時可官以自輔齊賢舉進士上決欲置之高等而有司第其名適在數十人後上不悅乃詔進士盡第二等及九經凡一百三十人悉與超除蓋為齊賢故也十月癸未詔權停貢舉一年興國三年八月甲戌上恐場屋間有留滯者乃詔諸州去年已得解者除三禮三

傳學究外餘並以秋集禮部九月甲申上御講武殿
覆試禮部合格人進士加論一首自是常以三題為
準得渤海以下七十四人乙酉得諸科七十人並賜
及第始賜宴於迎春苑授官如二年之制故事禮部
惟春放榜至是秋試非常例也詔自今禮部試進士
律賦並以平仄依次用韻十二月甲戌是冬諸州貢
舉人並集會將親征河東罷之自是每間一年或二
年乃置貢舉 興國四年十一月丙戌詔進士及諸

科引試日並以律文疏卷問義又詔張詠冠準同赴
大名舉議將首薦詠詠以同郡張覃素有文行即率
寇公請以覃為冠士論多之 興國五年閏三月甲寅
上御講武殿覆試權知貢舉程羽等所奏合格進士
得銅山蘇易簡以下百一十九人諸科五百三十三
人並分第甲乙賜宴始有直史館陪坐之制進士第
一等授將作監丞通判藩郡次授大理評事知令錄
事諸科受初等職事及判司簿尉 興國五年夏四

月丁丑趙國昌者求應百篇舉癸未上親試之出雜
題二十字令各賦五篇篇八句逮至日旰僅成數十
首率無可觀上以此科久廢特賜及第以勸來者仍
詔有司自今應百篇舉約此為題

長編

興國七年

九月癸丑上以諸道進士猥雜或挾書假手僥倖得
官所至多觸憲章欲懲革之甲寅詔所在貢舉等州
自今長吏擇官考試合格許薦送仍令禮部自今解
貢舉人依吏部選人例每十人為保有行止違踰為

他人所告者同保並當連坐不得赴舉 興國八年

正月壬戌兩京諸道州府貢士一萬二千六十人甲子命中書舍人宋白等十人權知貢舉三月丙子上御講武殿覆試禮部貢舉人擢進士長沙王世則以下百七十五人諸科五百一十六人並賜及第進士五十四人諸科百七十七人同出身賜宴始就瓊林苑其後遂為定制登科記是年始分甲按國史志分第甲乙乃五年等也六月戊申上因謂侍臣朕親選

多士殆忘飢渴名見臨問以觀其材拔而用之庶使
嵩野無遺佚而朝廷多君子爾十二月癸卯上謂宰
相曰邇來場屋混淆頗聞有僧道還俗赴舉者此輩
不能專一科教他日在官必非廉潔之士先須通經
過周孔之教或止習浮淺文章殊非務本之道當下
詔切戒之甲辰令諸州禁還俗僧道赴舉進士免貼
經只試墨義二十道皆以經中正文大義為問題又
增進士及諸科各試法書墨義十道又詔諸道下第

舉人依舊重請文解不得準近例常赴貢部

雍熙二年正月癸亥翰林賈黃中等九人權知貢舉
上謂宰相曰夫設科取士之門最為捷要然而近年
籍滿萬餘人得無濫進者乎已已詔自今諸科並令
量定人數相參引試分科隔坐命官巡察監門謹視
出入有以文字往覆與吏為奸者寘之於法私以經
義相教者斥出科場伍保預知亦連坐進士倍加研
覆貢舉人勿以曾經御試不考而薦始令試官親戚

別試者此九十八人又罷進士試律復貼經三月已
未上御崇政殿覆試禮部貢舉人得進士須城梁灝
等百七十九人庚申得諸科三百一十八人並唱名
賜及第唱名自此始據登科記 宰相李昉之子宗
諤及參知政事呂蒙正之從弟蒙亨鹽鐵使王明之
子扶度支使許仲宣之子待問舉進士皆入等上曰
此並勢家與孤寒競進縱以藝升人亦以朕為有私
也皆罷之青州人王從善應五經舉年始踰冠自言

通誦五經文注上歷舉本經試之其誦如流特賜九
經及第面賜綠袍銀帶錢三萬時左右獻言尚有遺
材壬戌復試又得進士上元洪湛等七十六人癸亥
得諸科三百二人並賜及第甲子詔御前下等人有
十五舉以上者及貢院第四等人凡八十四人並賜
大科及第 雍熙三年三月庚寅詔權停貢舉 雍
熙四年十一月庚寅雍熙初貢舉人集闕下者殆踰
萬計禮部考合格奏名尚不減千人上自旦及夕臨

軒閱試累日方畢十二月庚寅朔詔自今歲命春官
知貢舉如唐室故事應已得解者明年春集闕下未
得解者許至秋取解知貢舉宋白等請已得解在千
里內者委本處重加考試乃發遣千里外者就西京
仍乞戒勵試官務令精覈從之端拱元年閏五月先
是翰林禮侍宋白知貢舉放進士程宿以下二十八
人諸科一百人榜既出而謗議鋒起或擊登聞求別
試上意其遺才壬寅召下第人覆試於崇政殿得進

士馬國祥以下及諸科凡七百人令樞密院用白紙
為牒賜之以試中為目令權知諸縣簿尉謂樞密副
使張宏曰朕自即位以來親選貢士大者為棟梁小
者為榱桷今封疆萬里人無棄材六月丁巳上既擢
馬國祥等猶恐遺材復命右正言王世則等召下第
進士及諸科於武成王廟重試得合格數百人丁丑
士覆試詩賦又拔進士葉齊以下三十一人諸科八
十九人並賜及第 端拱二年三月庚寅知貢舉蘇

易簡等固請御試壬寅上御崇政殿試合格舉人得
進士閭中陳堯叟晉江曾會等一百八十六人諸科
孫何等四百五十人並賜及第七十三人同出身賜
宴始令兩制三館文臣皆預賜堯叟等箴一首勉以
修身謹行稽古効官之意堯叟及會並授光祿寺丞
直史館第三以下分授職事州縣官越州進士劉少
逸年十三中選既與宴則又賜御題賦詩數章皆有
趣授校書郎令於三館讀書時中書令史守當官陳

貽慶舉周易學究及第既而上知之令追奪所授勅
牒釋其罪勒歸本局謂侍臣曰科級之設待士流也
豈容走吏冒進竊取科名哉乃詔自今中書樞密院
宣徽學士院京百司諸州係職人吏並不得離局應
舉又詔貢舉人試科業畢並令試讀律其有不能
離經辨句及呼字乖繆者皆駁放如有通念一部與
本科及第是歲又申明舉人並請本貫文解之制鄉
里在聲教未通之地者許於兩京寄應又貢舉人中

有工賈雜類或被廢疾及曾罹刑責不得薦送其雜類
中有茂材異等卓然秀出者許之

淳化元年三月乙未詔權停貢舉 淳化二年吏部

呂蒙正以為取士之門無出貢部天下解薦頗失精
研望條制以懲謬濫上曰取士擇材國之令典不可
不謹 實訓 淳化三年正月丙申朔諸道貢舉人萬

七千三百皆集闕下辛丑命蘇易簡等同知貢院既
受詔徑赴貢院以避請求後遂為常制三月戊戌上

御崇政殿覆試合格進士先是胡旦蘇易簡王世則
梁灝陳堯叟皆以所試先成擢上第由是士爭習浮
華尚敏速或一刻數詩或一日十賦將作監丞陳靖
上疏請糊名考校以革其弊上嘉納之詔兩省三館
文學士始令糊名考校第其優劣以分等級得孫何
以下凡三百二人並賜及第五十一人同出身上諭
之曰爾等各負志業中我廷選効官之外更勵精文
翰勿墜前功也何等旅拜辛丑又覆試諸科擢七百

八十四人並賜及第百八十人出身就宴賜御製詩
三首歲一首進士孫何而下四人皆授將作監丞大
理評事通判諸州餘及諸科援故事州縣官入謝於
長春殿上謂宰相曰天下至廣藉羣材共治之今歲
登第者又千餘人皆朕所選擢此等但能自檢清美
替而歸則馴致亨行未易測也時詔刻禮記儒行篇
賜近臣及京城朝官與在外者并以賜何等令為座
右之誠初內殿坐書以賜御侍以寵之至陳堯叟始

易以箴用敦勉崇及孫何則詩論並賜時論榮之內
出卮言日出無數見者駭異不能措詞頌率扣殿檻
上請會稽錢易時年七十日未中所試三題皆就言
者指其輕俊特黜之 淳化四年三月乙亥詔權停
貢舉十二月辛丑詔三史及通禮科舊制各試三十
場今但試十五場每場令貢舉官取三卷發其端俾
之詩能曉大義及識奇字方為合格

至道二年三月丁卯是春詔權停貢舉 至道三年

五月壬午詔今歲貢舉宜令有司精校能否無或因循如覆試有不合格者當行嚴罰每進士一百人許解二十人明經以下諸科共有一百人解二十人如不及一百人亦約此數解送仍十分中只取二分仍須合格有藝不必依所定分數

會要云進士百人解二十九人恐九字誤特加詳考本志無此按孫何九月壬午議云貢士新規十取其二然則進士及明經諸科每百人各取二十

人

舊制國子監開封府舉人有與發解官親戚者止兩
司更互考試上慮涉私徇是秋特選官別試十月癸
丑命錢若水等覆考開封府得解進士試卷故事京
府解十人已上謂之等甲非文業優贍有名稱者不
處時以高輔堯為首錢易次之易頗為流輩所推許
意不平遂上書指陳發解官所試朽索馭六馬賦又
詩論策題意涉譏訕又進士數百輩詣府訟薦送不

當輔堯亦投牒遜謝請以易為首開封府以間上以
為士流紛競不可啓其端且欲鎮壓浮俗乃詔若水
等擢文行兼著者一人為首乃以孫暨為第一輔堯

第二易第三

咸平二年春正月乙丑命禮部尚書溫仲舒知貢舉
御史中丞張泳刑部郎中師顏同知貢舉刑部員外
郎董龜太常博士正涉同考試及封印卷首仍當日
入院禮部貢院封印卷首自此始三月癸亥詔今年

舉人頗衆若依去年人數取合格者慮有所遺可增
及七十人諸科增及百八十人禮部尋以孫暨等二
百五十人名聞並賜及第五月丙戌詔天下貢舉人
應三舉者今歲俱免取解自餘依例舉選必求實藝
無使遺賢當竝奏名朕親臨試 咸平三年三月辛
亥翰林王旦等三人權知貢舉三月戊寅詔禮部所
試合格舉人有權要親族者具名以聞禮部上合格舉
人甲午上御崇政殿親試命翰林宋白等與館閣王

府三司官二十一人於殿後西閣考覆國子博士
雷說著作佐郎梅詢封印卷首親覽入等者賜陳堯
咨以下二百七十一人進士及第一百四十三人同
本科及三傳學究出身堯咨堯叟弟也又命翰林邢
曷等十五人考校諸科得四百三十二人賜及第同
出身又試進士五舉諸科八舉及嘗經御試或年逾
五十者論一篇得進士二百六十人諸科六百九十
七人賜同出身及試校書郎將作監主簿賜宴日以

御詩褒寵之以堯咨等五人並為將作監丞通判第一等並九經為大理評事知大縣第二等為節察防團推官餘為判司簿尉試御者守選四月戊辰詔自今兩京諸路所解舉人宜先察訪行實或藝文可採而操履有虧投書匿名冒濫欺罔之類並嚴加懲斷勒歸鄉縣課役永不得就本貫收試解送所由官吏必當論罪仍御史糾之五月辛卯詔曰去歲天下舉人數踰萬計考覈之際謬濫居多蓋其薦送之時輒

容僥倖合申憲典以儆官司自今濫有解送及遺落
孤寒藝實之士並從覆試有不當者輒論如律庚子
詔權罷貢舉一年 先是詔劉蒙叟等試河北青齊
等州舉人得合格者五百八十二人上親試之賜進
士齊革等十三人諸科三百四十五人及第同出身
有下第求試武藝及量材錄用者五百餘人各賜裝
錢慰遣之命禮部叙為一舉若能捍寇即賞以官秩
咸平五年三月己未上親試禮部舉人得進士王

曾以下三十八人九經諸科百八十一人並賜及第
先是貢舉人集闕下者萬四千五百六十二命吏部
陳恕知貢舉恕所取士甚少以王曾為首糊名考校
曾復得甲科時議稱之舊制試經科復舊場第始議
進退恕初試一場即按通不去留之以是諸州舉送
官吏皆被黜責譴累甚衆江南恕鄉里所斥無多人
用怨讟競為謠詠譏刺或刻木像其首塗血擲於庭
又縛葦為人題恕姓名列置衢路過輒鞭之

景德二年正月癸亥命翰林趙安仁等五人權知貢
舉三月甲寅上御崇政殿親試禮部奏名舉人得進
士李迪以下二百四十六人第為五等第一二三等
賜及第第四五等同出身又得特奏名五舉以上一
百十一人第為三等賜同進士三傳學究出身翌日
試諸科得九經以下五百七十人第為三等並賜本
科及第出身同出身又得特奏名諸科三禮以下七
十五人第為三等賜同學究出身授試銜官

此據會要與實錄數略不同按七月戚綸奏是年諸道進士僅三千人諸科萬餘人

上謂宰相曰昨親閱考官所定試卷意其入末等者過多即別令詳考往往合格比緣臨試多士糊名校覆務於精當而考官不諭朕意過抑等第欲自明絕私甚無謂也迪與賈邊皆有聲場屋及禮部奏名而兩人皆不與考官取其文觀迪賦落韻邊論當仁不讓於師師衆與注疏異特令就御試參知政事王旦

議落韻者失於不詳審耳捨注疏而立異論趣不可
許恐士從今放蕩無所準的遂取迪而黜邊夏四月
丁酉樞密直學士劉師道責授忠武行軍司馬知制
誥陳堯咨責授單州團練副使先是師道弟幾道舉
進士禮部奏名將廷試近制悉糊名校等堯咨為考
官教幾道於卷中密為識號幾道既擢第或告其事
詔落籍永不預舉五月己未先是詔禮部貢院別試
河北貢舉人其曾援城者進士雖不合格特許奏名

諸科例進二場至二場者許終場五舉及經御試并年五十者並以名聞雖不更城守應比舉年六十及瀛洲有勞効者亦如之庚申上御崇政殿親試凡七日得進士范昭等五十一人賜及第四十五人出身諸科賜及第同出身特奏名進士諸科賜及第出身至攝助教隸殿侍者六百六十一人上以去歲河北用兵民甚驚擾其乘城捍寇奮勇力者多出士人欲廣示甄采所問經義有兩出者或具引為對考官將

黜去上親為發明焉特奏名進士李正辭論文武先後以為文者主乎靜武者主乎動動以止亂而至乎靜則先後可知上嘉其近理將擢上等會有言其嘗犯杖刑遂補三班奉職六月丁丑朔詔應進士科舉同出身試將作監主簿者並令守選故事登科皆有選限近制及第即命以官咸平三年初郊廷試賜出身者亦免選至是策名之士尤衆多設等級以振淹滯雖藝不及格悉賜同出身試秩解褐故令有司循

用常調以示甄別又下詔勸學權停貢舉二年時命兩制各撰勸學詔趙安仁所作最切於科試之病特俾用之七月丙子待制戚給與禮部貢院上言今歲諸道進士僅三千人諸科萬餘人其中文理紕謬經義十不九不者甚衆苟非特行約束必恐益長因循又慮官吏坐此殿罰因而避事全不薦人載惟取士之方今垂經遠之制今請諸色舉人各歸本貫取解不得寄應及權買甲產立戶諸州取發寄應舉人長

吏以下請依解十不入例科罪其開封府委官吏覺
察犯者罪如之鄉里遐遠久住京師者許於國子監
取解仍須本鄉命官委保判監司驗乃得附學發解
日奏請差官考試近年進士多務澆浮不務實學惟
鈔略古今文賦懷挾入試昨者廷試以正經命題多
情所出舊勅止許以篇韻入試今請除官韻略外不
得懷挾書策令監門巡捕官潛加覺察犯者即時扶
出仍殿一舉咸平三年詔旨進士就試不許繼燭每

歲貢院雖預榜示然有達曙未出者今請除書案外
不將茶厨蠟燭等入如酉後未就者駁放之仍請戒
勵專習經史自今開封府國子監諸路州府據秋賦
投狀舉人解十之四如藝業優長或荒謬至甚則不
拘多少開寶通禮義纂請改為義疏今後通禮每場
問本經四道義疏六道六通為合格本經二義疏通
三亦同今歲秋試止解舊人新人且令習學西川廣
南舊取解舉人並許免解今後及第三史通禮三禮

三傳除官日比學究明法望授月奉多處貴存激勸
上以分數過少約束過嚴恐阻仕進之路乃詔兩制
知貢舉官同詳定以聞於是翰林晁迥等上議令諸
州約數解送或自來舉子止有三兩人者欲聽全解
或其間才業卓然不羣者別以名聞南省引試前一
日分定坐次榜名曉諭勿容移徙遠人無籍者令召
命官保識就京府取解文武陞朝官嫡親許附國學
先寄應今還本貫者不得叙理前舉尚書周易學究

明法經業不廣宜各問疏義六道經注四通六通為合格三禮三傳所習浩大精熟尤難請問經注六道疏義四道以疏通三以上為合格餘如戚綸等條奏從之十二月己卯禮部貢院言昨詳進士所納士卷多假借他人文字或用舊卷裝飾重行或為庸書人易換文本是致考校無準請自今並令舉人親自投納仍於試紙前親書家狀如將來程試與公卷全異及所試文字與家狀書不同並駁放之或假用他人

文字辨認彰露即依例扶出永不得赴舉其知舉官亦望先一月差入貢院考校公卷分為等第如事業殊異者至日更精加試驗所冀抱異者不失搜羅躁進者難施偽濫又言尚書周易學究近年并為一科欲請試本經日每十道而二經各問五道仍雜問疏義五道經注五道以為定式向來明法止試六場請依尚書例試七場第一場第二場試律第三場試令第四場第五場試小經第六場試令第七場試律仍


於試律日雜問疏義五道三禮三傳經業稍大難為
精熟請每十道義中問經注六道疏義四道以六通
及疏通二經注通三為合格詔翰林學士邢昺與國
子監官同議可否昺等言尚書周易學究明法經籍
不多望名問疏義六道經注四道六通者為合格其
三禮三傳請如貢院所奏並從之 景德三年二月
己卯詔貢舉人因事殿舉及永不得入科場非被杖
者並許復應舉 景德四年冬十月乙巳翰林學士

晁迥等上考試進士新格詔頒行之初陳彭年舉進士輕俊喜謗主司宋白知貢舉惡其為人黜落之彭年憾焉於是更定條制多意白舊事而設關防所取士不復揀擇文行止較一日之藝雖杜絕請託然置甲等者或非人望自彭年始也十二月壬寅先是上嘗問輔臣以天下貢舉人數王旦曰萬三千有餘約嘗例奏名十一而已上曰若此則當黜者不啻萬人矣典領之臣必須審擇晁迥兢畏當以委之周起王

曾陳彭年皆可參預拯曰封印卷首若朝廷遣官主之於理亦順尤宜用素有操守之人旦曰滕玄晏於士大夫間少交遊上曰今當以宋巽代周起知舉令起與玄晏同掌封印事於是命翰林晁迥知制誥宋巽王曾陳彭年同知貢舉既受詔上諭以取士之道務在至公推寒進有藝者又命監察御史嚴穎張士遜監貢院門喬顏鄭奐陳既濟巡試鋪任隨陳覃點檢進士程試馬龜符等交考較諸科程試又命滕玄

晏封印舉人卷首用奉使印李道監封印院門進士
諸科試卷首送知舉官考校仍頒其式知舉官既考
定等級復令封進入送覆考所考畢然後參校得失
凡禮部封印卷首及點檢程式別命官皆始此乙巳
詔諸科舉人皆理場第自今不合格者須至復場方
得落下癸丑先是上降詔榜下禮部貢院序所以杜
絕私請搜剔寒秀之意舉人見者咸喜丙辰上與王
旦等言及之旦等曰昨頒考校新格周行中頗有論

議且言中書不能守科場大體但疑春官有私及詔
榜出天下乃知陛下務盡至公恐多遺材故更此條
貫也



羣書考索後集卷三十六